



Office of the Prime Minister's Chief Science Advisor
Kaitohutohu Mātanga Pūtaiao Matua ki te Pirimia

He tirohanga hou ki te kirihi i Aotearoa

Ko tā te pae nei i tōna tīmatanga, ko tētahi aronga māia, whānui anō hoki – ko te kimi huarahi hei whakawhāiti i te atarangi kirihi ka puta i te ao hou. Ahakoa i tōna tīmatanga, i whai mātou ki te whakawhāiti i tēnei aronga, i mārama mātou kei ngā wāhi katoa te kirihi, me te aha, me tukutahi te aro atu i ngā pito katoa. E turakina ai te raru o te para kirihi, me panoni ngā pūnaha, me whakaū i ētahi whakatikahanga – ko ētahi he nui, ko ētahi he iti – puta noa i ngā pito katoa o te pāpori.

Hei tīmatanga ake, i pohewatia e mātou te āhua o te anamata ina whakaūngia ai ēnei panonitanga. Ka takoto i a mātou tētahi whakakitenga e whai tūāpapa ai ngā mahi kei mua i a tātou. Ka oti i a Aotearoa te whai whakaaro anō ki te āhua o tā tātou whakamahi i te kirihi, engari he iti rawa ngā taunakitanga hei tautoko i ēnei whakataunga ā-pūnaha whānui nei. Hei tautoko i ngā whakataunga whai taunakitanga, kua whakakotahi mai, kua kōtuitui hoki mātou i ngā momo mōhiohio, me ētahi whakaaro o te hunga mātanga e riro ai i te kāwanatanga tētahi tirohanga whānui ki te kirihi i te tau 2019, e hāngai ana ki te pūnaha whānui, otirā e pākaha ana, i te horopaki o ngā āhuatanga mahi e tika ana huri i te ao.

Ka oti i a Aotearoa te whai whakaaro anō ki te āhua o tā tātou whakamahi i te kirihi, engari he iti rawa ngā taunakitanga hei tautoko i ēnei whakataunga ā-pūnaha whānui nei.

Ko tā te kaupapa 'He tirohanga hou ki te kirihi' ko te whai wāhi ki tētahi hurihanga ā-whakaaro, ā-mahi anō hoki i te pāpori whānui. Mā te whakarite i ngā whāinga ā-motu e mārama ana, i ngā mōhiohio e wātea pai ana ki te hunga hoko, e hāngai ana anō ki te whakamahia o te kirihi i te kāinga, mā te whakarite i ngā momo tūāhangā hāngai, mā te whakaū hoki i ētahi ture hou e aro pū ana ki te raru, e hua ai ētahi whakapainga whai tikanga, toitū anō hoki, i a ngāi kairangahau me ngāi pakihī auaha ka waihanga i ētahi rawa hou, i ētahi anga pakihī hou anō hoki. E whai nei mātou ki te whakaputa i tētahi puna mōhiohio e whakaponotia ana mā te iwi tūmatanui, e hāngai ana ki te āhua e whakamahia ana te kirihi, otirā, ki tētahi huarahi e koke tonu ai a Aotearoa. E arohia nuitia ana te kirihi e te ao, ā, kāore i ārikarika ngā kōkiritanga hei whakawhanake mā tātou. He wā whai tikanga tēnei e taea ana e tātou te whai whakaaro anō ki tā tātou whakamahi i te kirihi, e whāiti haere ai ngā pānga kino, engari e mau tonu ai ko ana tini hua. Kua whati te tai – e pao, tōrea.